

La muglieri ... di mastru Vicenzu
fimmina brava e tutta di chesa
parìa sincera, onesta e assà fideli
ducidda comu lu zùccaru e lu meli.

E quannu ... lu maritu si nni iva
dopu tanticchia l'amànti cci trasìva
di li cummàri 'unn'era beni vista
di tutti li mariti avìa la lista.

'Nta lu paisi ... si sparsi la vuci:
"si nni fuji la santa Pinuzzedda"
scappà di notti cu patri Giuanni
cchiù nicu didda almènu di vint'anni.

Nun ci cridiva ... lu mastru Vicenzu
c'avìa l'agnuna chini di lu 'ncenzu
pirsìnu 'mprofumàti avìa li corna
'ncinzàti boni di dda santa donna.

Ddu iornu ... ca tu mi lassàsti,
lu cori mè addivintà 'na petra.
A tia sula amàvu e mi 'ngannàsti,
la vita a mia mi la ruvinàsti.

Ristàvu sulu ... e malu arriddùttu
e trascuratu comu un cannavàzzu
e mi passà la vòglia di campàri,
na mala cosa un iornu a cuminàri.

La testa all'omu ... ormai 'un ci riggia:
murennu la finisciu di pinzàri
quannu ti cummigliava di carizzi
e mi prigàva ti li tò biddizzi.
A tia sula ... dètti li vasàti,
e sulu a tia fimmina haiu amàtu,
pi tia 'stu cori ancòra si cummovi
ora, siddu mi cerchi nun mi trovi.

A mastru Vicenzu ... 'ncampagna lu trovàru
'mpiccàtu cu la testa a pinnuluni
'na scrittù 'nta lu pettu avìa appizzàtu:
"Moru pinzannu l'amuri ... a tia datu."

Iu vi ringràzziu ... d'avirimi ascutàtu,
lu tempu e la pacenza c'at'avutu,
si vi piacì 'sta storia ca cantavu,
battitimi li manu e... vi salutavu.